



## JUDICIAL SYSTEM MONITORING PROGRAMME

### PROGRAMA DE MONITORIZAÇÃO DO SISTEMA JUDICIAL

#### *Komunikadu Imprensa*

Períodu : Jullu 2011

Edisaun : 25 Jullu 2011

#### **JSMP Lamenta; Komisaun Permanente Parlamentu Nasionál seidauk fonsiona iha tempu resesu**

Parlamentu Nasionál, iha loron 15 fulan Jullu 2011 hahú ona tempu resesu husi periodu normál funksionamentu servisu ba Quatru Sesaun Lejislativa tuir rejimentu Parlamentu Nasionál artigu 45<sup>o</sup> konabá Sesaun Lejislativa.

Iha artigu ne'e, regula enseramentu periodu normál funksionamentu servisu Parlamentu Nasionál ba kada sesaun lejislativa durante fulan tolu (3) hahú husi loron 15 Jullu to'o loron 15 Setembru.

Diretór Ezekutivu JSMP Luis de Oliveira Sampaio *haktuir katak JSMP sente lamenta uitoan tanbá to'o periodu resesu parlamentar nian tama, Komisaun Permanente ne'ebé hari'í husi kompozisaun bankada ida-idak iha Parlamentu Nasionál tuir sira nia proporsionalidade ka totál reprezentasaun seidauk estabesele no Parlamentu Nasionál falla atu estabesele Komisaun refere bázeia ba Artigu 48 Rejimentu Parlamentu Nasionál.*

Tuir observasaun POP nian katak to'o ohin loron bankada barak maka seidauk apresenta sira nia delegasaun ba Komisaun Permanente, maski iha ona anunsia fila-fila husi meza Parlamentu Nasionál.

Tuir JSMP funksionamentu Komisaun Permanente ne'e importante tebes atu atende ba kualker asuntu urjente ne'ebé akontese durante período resesu hanesan atende rekerimentu husi Prezidente da República tuir alinea d) artigu 86<sup>o</sup> Konstituisaun RDTL inklui atende keixa ka lamentasaun husi povu ba sira nia representante iha Parlamentu Nasionál.

Tuir prosedimentu normál, bainhira hetan ona reprezentasaun husi kada bankada, qourum Komisaun Permanente sei hili sira nia estrutura, hafoin bele eleze funsaun iha Parlamentu Nasionál durante tempu resesu tuir lei 15/2009 iha Rejimentu Internu Parlamentu Nasionál, artigu 49 alinea 1).

JSMP hanoin katak funksionamentu ba Komisaun Permanente presija duni, harê ba kna'ar Parlamentu Nasionál ne'ebé importante tebes atu hola pozisaun representa estadu iha kualker situasaun ruma.

Mesmu nune'é JSMP sente haksolok no kongratula Distintus Deputadu Parlamentu Nasionál sira tomak ba sira nia komitimentu no vontade diak atu hamenus tiha tempu resesu ba fulan ida deit (husi 15 Jullu to'o 15 de Agostu) liu husi aprova rezolusaun ne'ebé apresenta husi Prezidente Parlamentu Nasionál Fernando Lasama de Araújo, ho razaun atu bele aprova lalais tiha lei balun ne'ebé sei pendente antes proposta Orsamentu Jeral Estadu ba tinan 2012 tama ba Parlamentu Nasionál.

Tuir JSMP katak vontade no komitimentu hanesan ne'e persiza hetan apresisaun husi komponente soseidade tomak tanbá deputadu sira hakarak sakrifika sira nia tempu iha período resesu atu kontinua serve povu nia interese no hases tiha sira nia interese partikular.

Atu hetan informasaun kle'an favor kontaktu direktamente:

Luis de Oliveira Sampaio

Direitór Ezekutivu JSMP

Diresaun e-mail: [luis@jsmp.minihub.org](mailto:luis@jsmp.minihub.org)

Landline: 3323883